



Communicaziun a las medias

Data: 29.01.2020

Annulaziun da la limitaziun dal dumber da segns per la purschida online en rumantsch da la SSR

A chaschun da sia seduta dals 29 da schaner 2020 ha il Cussegl federal decidì che las contribuziuns textualas en rumantsch publitgadas en il rom da la purschida online da la SSR n'èn – a partir dal 1. da mars 2020 – betg pli suttamessas ad ina limitaziun dal dumber da segns. En l'avegnir dastgan questas contribuziuns surpassar 1000 segns, e quai er senza referiment ad in'emissiu. La concessiun da la SSR vegn adattada en moda correspondent. Questa midada permetta ina nova collavuraziun tranter la SSR e las medias privatas grischunas, e contribuescha uschia a mantegnair la purschida mediala en rumantsch.

Per realisar il project «Medias Rumantschas» ston vegnir mitigadas las cundiziuns actualas per ils texts online en rumantsch e cun quai er adattada la concessiun da la SSR. En il sectur online da la SSR dastgan texts che tractan novitads, sport, chaussas regionalas u localas senza referiment ad in'emissiu avair ina lunghezza maximala da 1000 segns. Il Cussegl federal ha ussa decidì da dismetter questa limitaziun per la purschida da la SSR en rumantsch. Questa adattaziun da la concessiun pertutga exclusivamain la purschida da la SSR en la Svizra rumantscha e vala mo per rtr.ch. Cun questa decisiun duai la piazza mediala rumantscha vegnir rinforzada a lunga vista.

Las medias rumantschas opereschan sin martgads pitschens e linguisticamain fitg fragmentads. Per quest motiv èn ellas suttamessas ad in squitsch economic spezial. Pertutgadas èn oravant tut las trais gasettas existentas «La Quotidiana» (Somedica AG), la «Posta Ladina» (Gammeter Media AG) e la «Pagina da Surmeir» (Uniun rumantscha da Surmeir). A medem temp contribueschan questas medias scrittas fundamentalmain a preservar la lingua rumantscha che dependa da l'utilisaziun e da la preschientscha cuntinuada da tut ils idioms en il mintgadi. Per garantir il mantegniment dal schurnalissem rumantsch han las medias privatas grischunas e la SSR elavurà cuminaivlamain il project «Medias Rumantschas». En il rom d'ina collavuraziun vegnan barattads gratuitamain cuntegns. Tranter auter vegn la Radiotelevisiun Svizra Rumantscha (RTR) a metter a disposiziun a las medias stampadas grischunas novitads online actualas en rumantsch grischun. Viceversa surpiglia RTR er texts da las medias privatas. Per quests motivs èsi necessari d'annullar la limitaziun dal dumber da segns.

Communicaziun a las medias • **Annullaziun da la limitaziun dal dumber da segns per la purschida online en rumantsch da la SSR**

Per ulteriuras dumondas:

Uffizi federal da communicaziun UFCOM
Post da medias
+41 58 460 55 50, media@bakom.admin.ch

Departament responsabel:

Departament federal per ambient, traffic, energia e
communicaziun DATEC

Infurmaziuns supplementaras:

Concessiun SSR (en tudestg)

<https://www.bakom.admin.ch/bakom/de/home/elektronische-medien/informationen-ueber-radio-und-fernsehveranstalter/srg-ssr/konzessionierung-und-technik-srg-ssr.html>